

LIS PREDICJIS DAL MUINI

di pre Josef Marchet - Udin, 1965

Lis litanis

Mi consoli, mi consoli a viodi cuatri-cinc fantats di plui dal solit, usgnot, a preâ rosari. Soldâts vignûts in permès par vie des fiestis, no mo? A varan fat par lavâsi la bocje cun cuatri avemariis: parcè che, cence tristerie, si po scrupulâ che la vebin sporcje une vorute!

E je simpri stade cussì cu la int di Gargagnà e dai paisuts chenti ator: a cjase di fruts a rispuindi messe, di frutats a cjantâ in coro; fûr di cjase, massime tal talian, dome risiis e dome sporcjetâts, une daûr chê altre, une parsore chê altre.

Mi impensi simpri di chê volte che o soi stât coscrit ancje jo... sepi Diu cetancj agns indaûr! Tin Burcjul - velu la jù, che al è ancjemò cu la corone in man! - al veve barufât cun me, doi dîs prin, par volê jessi di chei cuatri che a vevin di puartâ la Madone inte prucission dal perdon; in chê dì che o sin lâts ae visite, Mari sante benedete, ce ledan di cristian! Cui ti vevial insegnadis chês litanis di sporchets, Tinut? E cussì ancje altris di lôr, che no vuei nancje nomenâju parcè che a son bielzà lâts a fâ tiere di citis: se lis àn cjantadis, la vie di là, dutis chês che ur son scjampadis di bocje in vite lôr, garantide che ur reste ce rustîsi lis crodiis!

E za timp mi è capitât di lâ fintremai a Cjasarse par vie di chel mierli di gno zinar, che si jere dissipât lant ator cu la moto cuant che al jere in briscule... (malandrete la canaie, che Diu mal perdoni!). Po ben, di Udin in là mi cjatai a jessi suntun vagon plen di soldâts furlans: alpins che a tornavin de licence. Volêso crodimi? O ai scugnût cjapâmi sù e lâ intun altri scompartiment, se no o rimetevi il gustâ di tant che mi vevin ingomeât. E si che jo no soi stomeghin! Lôr a porconavin di rabie, a porconavin di gjonde, a porconavin di maluserie, a porconavin di ligrie, a porconavin ridint, a porconavin di cjoche, a porconavin fevelant, ridint, cjantant, rutant... Misericordie cu la palote, ce raze di animâi! Ce biade coiarie, cussì stupide che e crôt di semeâ sveltone a blestemâ e a fevelâ malementri! E salacor la dì prime, cun chê lenghe stesse, a jerin stâts in coro a cjantâ la diessile!

Ce vino di scometi, fantats, che nancje voaltris no veis mai pensât ce figurate di grubians che o fasês cuant che o tacais a sberghelâ chês bielis cjantosis, plenis di finece e di poesie, che us plasin tant: "Mi son alpin - ci piace il vin - tengo l'anemorata - vicin quartier... ". E lassin chês altris che no si po nancje vêlis iniment in glesie.

Ancje doman messe aes nûf e funzion aes cinc. E cun cheste us doi la buine sere.